

南無無我最第一南無普照一切眼南無證
理淨慧眼南無三慧真實眼如是一百八名
若復有人於其辰朝發志誠心或讀誦或禮
念或憶持或聽聞獲得最上吉祥福德所有
一切煩惱及諸罪業速得清淨不受輪迴常
得解脫乃至成佛

此大牟尼功德名 我今讀誦及禮念
普將迴施與群生 同得證成菩提果

佛一百八名讚

佛說布施經

三藏法師法賢奉詔譯

如是我聞一時佛在舍衛國祇樹給孤獨園
與大苾芻衆說布施法有三十七種一以信
重心而行布施當得離衆嫉妬人所崇敬二
依時施得三業清淨四時安隱三常行施得

十五

五

身心適悅無散亂失四親手施得手指纖長
身相端正五為他施復得他人行大捨施
六依教施心離取相得無為福七以妙色具
施得身色端嚴衆所愛樂八以上妙香具施
恒得旃檀之香受用供養九以上味施得味
中上味充益肢體十如法尊重施得安隱快
樂衆人喜見十一以廣大心施得無量廣大
之福十二以美食施得離飢饉倉庫盈溢十
三以漿飲施得所往之處無諸飢渴十四以
衣服施得上妙衣莊嚴身相十五以住處施
得田宅寬廣樓閣莊嚴十六以卧具施得生
貴族資具光潔十七以象馬車輦施得四禪
足無擁妙用十八以湯藥施得安隱快樂無
諸疾病十九以經法施得宿命等通二十以
花果施得七覺支花二十一以花鬘施得脫
貪瞋癡垢二十二以香施得離煩惱臭穢二
十三以傘蓋施得法自在二十四以鈴鐸施
得言音美妙二十五以音樂施得梵音深妙

二十六以然燈施得天眼清淨二十七以繒
綵疋帛施得解脫衣服二十八以香水灑如
來塔廟二十九以香水浴如來身三十以香
油塗飾佛像共得三十二相八十種好三十
一以香水施浴衆僧得富貴家生少病安樂
三十二以慈心施得顏貌和悅無諸瞋恨三
十三以悲心施得離殺害三十四以喜心施
得無所畏遠離憂惱三十五以捨心施得離
罣礙證寂滅樂三十六以種種施得種種福
三十七以無住無相心施得無上正等正覺
佛告諸苾芻如是三十七種智者所行微妙
施行汝今受持

尔時舍衛國王白佛言世尊我等云何而行
布施佛言大王若求勝妙福報而行施時慈
心不殺離諸嫉妬正見相應遠於不善堅持
禁戒親近善友閉惡趣門開生天路自利利
他其心平等若如是施是真布施是大福田
復次行施隨自心願獲其報應或以妙色名

十五

六

香珍味軟觸親手布施得衆人尊重眷屬圓
滿富貴安樂之報或以飲食布施而得大力
或以酥油之燈布施而得天眼或以音樂布
施而得天耳或以湯藥布施而得長壽或以
住處布施而得樓閣田園或以法說布施若
得甘露佛言大王若以十善行施復得十種
報應十善者不殺生不偷盜不姪欲不妄語
不綺語不惡口不兩舌不貪不瞋不癡而得
命不中天財無散失眷屬清潔所言誠諦離
諸嫉妬人所喜見親友和睦不墮貧賤顏貌
端正智慧相應獲報如是
佛言大王若以上妙樂飲食供養三寶得五
種利益身相端嚴氣力增盛壽命延長快樂
安隱成就辯才如是南贍部洲一切衆生父
母妻子男女眷屬如上布施隨願所求無不
圓滿說此法已皆大歡喜作禮而退

佛說布施經